

四庫全書

集部

欽定四庫全書

集部

靜修集

總目
卷一至
四

詳校官中書臣徐志晉

侍讀臣孫球覆勘

覆校官中書臣汪學金

校對官中書臣蔣寬

謄錄監生臣劉廷勳

欽定四庫全書

集部五

靜修集總目

別集類四元

卷一

辭二章

五言古詩三十四首

卷二

和陶詩七十六首

卷三

七言古詩二十三首

雜言五首

卷四

五言律詩三十七首

七言律詩六十九首

卷五

五言絕句三十七首

七言絕句九十四首

卷六

近體樂府二十二首

卷七

雜著五首

釋菜先聖文一首

與政府書一首

卷八

碑銘五首

卷九

碑銘表誌

卷十

記十首

卷十一

序說一十六首

卷十二

序說銘贊雜文二十九首

卷十三

五言古詩三十八首

卷十四

七言古詩三十二首

雜言二首

卷十五

五言律詩三十六首

七言律詩三十二首

卷十六

七言律詩五十九首

卷十七

五言絕句一十五首

七言絕句七十一首

卷十八

七言絕句六十一首

樂府一十一首

卷十九

五言古詩八首

七言古詩八首

五言律詩二十九首

卷二十

七言律詩四十一首

卷二十一

七言絕句五十三首

卷二十二

雜著七首

卷二十三

書八首

卷二十四

記序哀詞贊疏跋題十一首

卷二十五

先世雜事記八首

臣等謹案靜修集二十五卷續集三卷元劉
因撰因字夢吉容城人至元十九年用薦為
右贊善大夫教宮學近侍子弟未幾辭歸後
復以集賢學士徵固辭不就卒年四十有五
事蹟具元史本傳因早歲詩文才情馳騁既
乃自訂丁亥詩五卷盡取他文焚之卒後門
人故友哀其軼稿得樵菴詞集一卷遺文六
卷遺詩六卷拾遺七卷最後楊俊民又得續

集三卷其中或有因所自焚者未可知也至
正中官為刊行因其所居齋名之曰靜修集
因研究經學沈潛於周程張朱之書而通其
突奧歐陽玄贊其畫像至稱其為往聖繼絕
學來世開太平說者不以為溢美其於詞章
之學似非所屑屑注意然觀平日論詩有云
魏晉而降詩學日盛曹劉陶謝其至者也隋
唐而降詩學日變變而得正李杜韓其至者

也周宋而降詩學日弱弱而後強歐蘇黃其
至者也其評騭精確如此則其流派之正亦
概可見矣乾隆四十二年二月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

靜修集卷一

丁亥集一

元 劉因 撰

辭

白雲二章

白雲凝情兮佩月光
白露結綵兮明幽芳
衆星皎皎兮水波不揚
渺予思之若遇兮耿在目而不忘音容著兮
形無方肅予中立兮
四無旁子母歸去兮
山高水長白雲高飛兮
杳不可尋靈風長往兮
聲不在乎幽林皎

月東生兮忽西沈玄鶴何逝兮遺之音予思未及兮實懷我心儵萬里兮捐所歆曠同游兮啟雲襟子毋歸來兮山幽水深

五言古詩

三十四首

韓魏公祠

定州古北門作鎮多英奇如何郡學傍獨有韓公碑乾坤極厚大運動物不知堂堂宋三朝幹旋公似之惟公玄默間泰山已四維天宇公之祠元氣非公誰郡人一

何愚而於公欲私大者且勿論緒餘猶世師千年閱古

堂誰歌鄭國詩

公閱古堂
富公有詩

裴回老栢前目送秋鶴飛悠

悠五色雲悵望今何歸

仙臺

碣石來海際西南奄全燕中有學仙臺燕平欲昇天燕
平骨已朽遺臺猶相傳雖復生青松歲久摧為烟極目
望海波不見三山巔三山巨鰲簪山人蟻蝨然使無不
足論信有亦可憐大塊如洪爐金石能久堅天地會有

盡何物為神仙空山無笙鶴落日下饑鳶今古非一臺
浩歎秋風前

黃金臺

燕山不改色易水無新聲誰知數尺臺中有萬古情區
區後世人猶愛黃金名黃金亦何物能為賢重輕德輝
照九仞鳳鳥才一鳴伊誰腐鼠棄坐見饑鳶爭周道日
東漸二老皆西行養民以致賢王業自此成黃金與山
平不抹兵縱橫落日下荒臺山水有餘清

經古城

我行常山尾高城下吾前按轡覽形勢依依見金燕易
水開前襟飛狐連右肩遙想豪傑塲撫已增慨然薪人
過我傍一笑如相憐指城前問余考古今幾年沈思未
及答行歌入蒼烟

馮瀛王吟詩臺

林壑少佳色風雷有清秋為問北山靈吟臺何久留時
危亦常事人生足良謀不有撥亂功當乘浮海舟飄飄

扶搖子脫屣雲臺遊每聞一朝草尚作數日愁朝廷乃
自樂山林為誰憂視彼昂昂駒奈此汎汎鷗四維既不
張三綱遂橫流坐令蚩蚩民謂茲聖與儔蚩蚩尚可恕
儒臣豈無尤不有歐馬筆孰能回萬牛太行千里來瀟
洒橫中州今朝此登臨孤懷漲巖幽何當剷疊嶂一洗
空山羞

張燕公讀書堂

陰壁下寒泉陽崕隱深洞想像張幽州當年此絃誦遐

情納方寸灝露驚宵夢既有真積功豈無致時用不然
起絕學猶當垂後統濟濟唐開元儒臣相伯仲文雖數
燕許名不並姚宋遂令百世下烟霞抱餘痛尋幽縱步
貪懷古清歌送緬思白鹿翁眼中見連棟茲山有道氣
會遇或天縱聊以永今朝白雲不可種

龍潭

盤磴脫交陰平壇得高岑高岑不可攀哀湍激幽音窮
源豈不得爽氣來駸駸靈潤發山骨沮洳下崕陰為問

石上苔妙理誰曾尋乾坤有乾溢此水無古今下有靈
物棲倒影毛髮森東州旱連歲呼龍動雲林顧此百丈
潭豈無三日霖為霖此雖能鞭策由天心日暮碧雲合
空山深復深

召飲山亭

飲人不飲酒千載誰與期賴有此山色我杯時一持西
郊遠市井林亭對山暉主人知愛客釀酒無虛時佳客
麟鳳然人亦難致之君亭有吾山招飲當不辭

西山

西山澹無姿中有羲皇前翻思太古人事業何不傳三
墳亦何罪世遠成灰烟紛紛後來人暮死朝爭妍勲名
史一策學術文千篇古人豈不然後有無窮年惟餘方
寸心天地相後先

池上

今朝好風日出門何所之西域得山多一水楊清漪溪
翁指水言此貨天下奇不有磴百區猶當稻如坻擬從

陶朱公斷取高陽池纍纍九州谷隱隱千石陂食魚素
無望觀水今有期所期徧區域不見貧者饑

歡飲

同類天地中相親理所宜前後億萬年而我生此時前
予既不及後孰能待之同時四海內徧識將無期所識
既無幾賞心又當誰政有賞心人會遇亦復希當其會
遇時豈無事相違今朝好風色不飲君何辭

女蘿生松枝

女蘿生松枝不及松生年松枝摧為薪豈知山石堅誰
云高山雲曾見天地先人生朝露爾豈止蜉蝣然蕩蕩
山海圖悠悠皇極元其間何物無何事無推遷事有古
今希達觀如寒暄君今不遠游自苦良可憐

有大如天地

有大如天地日夜長乾乾有小如螻蟻營營誰使然我
亦形蹟中豈得獨安閒萬物相為用錯綜盈兩間如身
百骸具少一為不完有形無虛生豈予獨贅偏森然氣

分內既有不可鵠陂蛇誰宥之生生亦能延安有人道
尊湮滅獨不傳乾乾以為師餘者一聽天

孤雲

孤雲生幾時冉冉何所適豈無崑華高路遠嗟獨力徘徊
天中央明月為顏色下有幽棲士歲宴倚青壁朝飲
澗下泉暮拂松間石相對澹忘情倒影寒潭碧

雜著

二首集
陶句

人生豈不勞終古謂之然孰是都不營早起暮歸眠過

足非所欽躬耕非所歎但使願無違甘以辭華軒正爾
不可得在已何怨天自古有點妻被服常不完榮叟老
帶索饑寒況當年何以稱我情賴古多此賢

善惡苟不應鬼神昧茫然是非苟相形行止千萬端世
路廓悠悠聊且憑化遷居常待其盡任真無所先詩書
塞座外弱子戲我前親戚共一處餘糧宿中田促席延
故老斗酒散襟顏聊以永今朝百世誰當傳

晨起書事

丁丑五月
二十八日

蒼星彗明河三月麗朱方兩月忽散落一月留中央下
有五星連西近東少張仰面東北隅流星墜綵芒誰令
月有癭飄搖及吾窓須臾日東生有星環四旁一星當
日中佇視搖晶光自北忽西旋老陽已榆桑西北雲一
絲翠暈揚清芳嫩雲生碧蘚得句聲琅琅俄見雲有魚
其大丈許長火繩紛繞之昂然欲飛揚呼友與共觀此
境已茫茫靈樞夢為病周官夢為祥寤言札諸闥庸俟
知者詳

偶書

開眼昭昭天無形有痛痒斯人亦安忍
斲喪甘自枉視中蟲一齧其死隨翻掌
乃知天人間感應如影響

游天城

逕遠澗隨曲崖深山漸少居然翠一城
四壁立如掃天設限仙凡雲生失昏曉
平生萬事懶登臨即輕矯山靈知信息
風烟久傾倒顧瞻困能仰汎應習稱好
端居得蕭寂遠耽碍孤峭乃知方寸間
別有萬物表未須凌絕

頂胸次青已了

游源泉

叢祠鬱蒼翠萬古藏清幽
泠然石上足不逐蒼波流長
風索我御欲舉仍遲留白雲
何山來相對亦悠悠

會飲山中

鳴禽變初節白雲思高山
笑拊蒼然石為謝區中緣舉
杯屬何人四顧心茫然雲烟
互吞吐巖壑如相先人間
此幻境過眼成千年山家有
酒令飲外可無言

玉溪精廬

居然山四顙危檻俯晴春
川氣生不極翠潤流衣巾
林陰起薄暮酒色生微醺
歌聲忽落谷驚歸欲飛雲

隱仙谷

山川含太古風氣如未開
中有幽棲人日暮斲蒼苔
吾胸素羲皇人世不可諧
此地復何地恍若登春臺
山局掩對峙石徑迷縈回
桑麻連水竹屋宇依山崖
燕南避世謠千古知我懷
橫渠百世師一區竟相乖
知音得元

老龍門有遺齋

伊川先生上文潞公求龍門庵地書畧曰勝善上方舊址荒廢為無用之地欲

得葺幽居其上為避暑著書之所唐王龜叟書堂於西谷松齋之名傳之至今某雖不才亦能為龍門添勝迹

於後代為門下之美事

賤子孤旅人念此良悠哉於世豈有望居

山亦無媒舉杯對山靈欲去仍徘徊他年要勝跡此駕

當招來

遊雲水庵

乘春奮幽潛觀化登丘山哀淙聞遠壑息駕思雲關壑石密松桂結屋誅茅營生烟紛漠漠激流散潺潺山石

浮壽色澗水榮歡顏覽物有真意撫節驚循環悠然千
載情儼若盤石間眷焉欲晤語古人何當還

題歲寒亭

西州有佳士種松秋水垠歲寒得所師名齋豈徒云要
知松柏心亦願濯南薰交枝鬱蔥菁喜與萬木羣當此
搖落中勁節獨排雲雖得後凋知歲寒非所欣

泛舟西溪

萬山倒滄浪一葉凌崖峩峩為飛舞翠影如婆娑輕

陰散雨足淨綠生圓波人間碧海幻老眼青銅磨風雲
幾千古辨此雨一簑溪南有幽人鼓棹前山阿烟深渺
無處月色浮松蘿

喜雨

以雨我公田
分韻得雨字

壬申秋大水一雨乃孤注九年錨寸積曾未辨朝露陂
塘此何日還我滄洲趣夜來雲初作期待一如故既聞
漸成陣尚謂行且住甫寸驚已狂及犁歎無數平明報
三尺感激淚將雨玄功亦雄哉回旋易拍顧呼酒欲鯨

吞哦詩有神助區區喜與憂豈為一飽慮

雪花酒

分韻得如字

古人重甘澤雨雪名所居何如千里白飲之寄一壺神
物與造化醞釀同機樞夢中聞酒熟天花已紛如況復
吟風亭興來操百觚天地無餘春山澤豈全臞何當一
灑之豐年徧寰區收藏有奇功六月天為鑪冰壺連水
鑑千載誰與俱林間有清風此酒不可無

種松

萬牛來丘山大廈高崔嵬當年誰辛苦遺此千歲材手
持百松子與之俱傾頽殷勤囑造物為護荒山隈今來
見豪末喜溢蒼烟堆十年望根立百年排風雷自此千
萬年再見明堂開東家十年計戢戢千頭栽豈不早有
望求此良悠哉

詠梅

燕南舊無梅寒花為誰芳月色隱清艷幽香竟難藏寸
心警殘雪孤根待朝陽只有橫斜枝萬里同昏黃

白蓮

冰華離風塵素質更深靜
灝露凝幽香皎月散清景
誰竝絕世姿澹然水中影
青房生苦心秋風逼涼冷
安得同愛人共此良夜永

玉簪

堂陰秋氣集幽花獨清新
臨風玉一簪含情待何人
含情不自展未展情更真
徘徊明月光泛泛如相親
因之欲有託風鬟渺水輪

瑤花圖

淮海秀瑤枝獨立映千古遙知辨此初坤靈心亦苦平生勞夢想江烟隔南浦春風不相待回首以焦土畫圖今見之依稀春帶雨芳心紛已碎仙葩聚如語瑤臺舊高寒人間此何所翩翩風袂輕幽香暗相許

八月十七日望

前日中秋節今宵月方圓人間歡賞竟此際吾獨觀吾觀意有在高歌問青天蒼蒼非正色而況此嬋娟去我

當遠近相值果正偏徑圓知幾許附麗或空懸既疑紈
扇如復昧左右旋有食定何物中黑胡為然何當凌倒
景迫視如弄丸一祛萬古惑如生天地先吾觀意在此
餘光何足憐

靜修集卷一

欽定四庫全書

靜修集卷二

丁亥集二

元 劉因 撰

五言古詩

和陶七十六首

和九日閒居

深居忘晦朔好事惟侯生
偶因菊酒至喜聞佳節名香
醪泛寥廓醉境還空明青天
凜危帽浩蕩空秋聲緬懷
長沙孫生氣流千齡乾坤一
東籬南山久亦傾回首聲
利徒僅比秋花榮撫時感遺
事可見萬古情興詩此三

復淹留豈無成

和歸田園居

五首

少小不解事談笑論居山為問五柳陶栽培幾何年安
得十畝宅背山復臨淵東隣漢陰圃西家鹿門田前通
仇池路後接桃源間熙熙小國樂夢想羲皇前石上無
禾生粲爛空白烟營營區中民擾擾風中顛未論無田
歸歸田誰獨閒迂哉仲長統論說徒紛然

商顏高在秦天馬脫羈鞅東陵高在漢雲鴻渺遐想超

然秦漢外當年誰長往每讀淵明詩最愛桃源長北望
無終山幽棲亦深廣空和歸田吟商聲振林莽

塊坐生理薄出門交友稀田翁偶招飲意愜澹忘歸游
秦驚避竈過宋須微衣永謝門外屨從翁不相違

魯叟五十畝簞瓢足自娛顏生未全貧貧在首陽墟商
顏遇狂秦蕭然真隱居箕山彼何為結巢松一株富貴
豈不好有時貧不如在卷非不足當舒豈有餘誰持三
徑資笑我囊空虛傭書易斗米吾田亦非無

吾宗古清白耕牧巨河曲雖非公卿門紆朱相接足陵
谷變浮雲家世如殘局舉目遺安齋

先考嘗題所居齋遺安

先訓

炳如燭區區寸草心依然抱朝旭

和乞食

好廉中無實觸事或發之萬鍾忘義理一簞形色辭吾
貧久自信笑聽溝壑來偶聞啼饑子低眉問殘杯免啼
尚云可最愧南陔詩豈無乞貸念慚非動時才人理諒
多闕清規亦徒貽

和連雨獨飲

吾心物無競未醉已頽然乾坤萬萬古坐我春風間弱
女亦何知挽衣呼我仙窺人簷鳥喜共舞風雪天舉觴
屬義皇身在太古先忽遇弄丸翁見責久不還一笑了
無間今夕是何緣遙遙望白雲欲辨已忘年

和移居

二首

十年寓茲邑渾家如泛宅言念息吾廬頽然在斯夕床
頭四子書補閑薪水役寒蔬挂庭柯風葉滿鹿席藩垣

金史卷之二
護清貧簞瓢閱今昔珍重顏樂功先賢重剖析

躬耕力不任閉戶傳書詩資生豈師道舍此無所之今
年穀翔貴自笑還自思安居逢歲歉乘除動天時彊顏
慰妻孥一飽在來茲雪好炊餅大占年不吾欺

和還舊居

巨河西北來浩浩東溟歸河邊兩榆柳游子無窮悲樹
老我何堪物是人已非隣翁醉相勞自云鬼錄遺早晚
見先公問爾今何依豈無磊磊功使我地下推吞聲謝

隣翁讀書志未衰持此報吾親餘事手一揮

和九月九日

九月閉物初孤陽困無交園木眩霜紅豈解憂風凋物
外風雱春氣橫湖海高舉手謝浮世凝睇思層霄揮觴
送秋節哀此造物勞傾河瀉萬象隨手如沃焦崇高笑
山斗未能出鈞陶況彼草間蟲區區寒露朝

和飲酒 二十首

尊壘上玄酒此意誰得之人道何所本乃在羲皇時頗

愛陶淵明寓情常在茲子倡我為和樂矣夫何疑有問
所樂何欲贈不可持

醉翁意自樂非酒亦非山頽然氣沖適酒功差可言謂
此不在酒得飽忘豐年君知太和味方得酒中傳

阮生本嗜狂欺世仍不情酒中苟有道當與世同名何
為戒兒子不作大先生良心於此發慨想令人驚士生
道喪後美才多無成

草木望子成豈憂霜露飛禽鳥忘身勞但恐饑離悲生

意塞兩間乾坤果何依我既生其中此理須同歸喜見
兒女長不慮歲月哀雖為曠士羞理在庶無違

山人有靜癖苦厭一瓢喧奈何衆寡號萬木隨風偏我
常涉千里險易由關山今古一長途遇險焉得還哀歌

嘆安歸夷皓無此言

我安適歸謂伯夷歌吾將何歸謂
四皓歌此司馬遷皇甫謐所作非

知夷皓
之心者

茫茫開闢初我祖竟誰是於今萬萬古家居幾成毀往
者既已然未來亦必爾何以寫我心哀泉鳴綠綺

金定四子集卷二
生備萬人氣乃號人中英以此推衆類可見美惡情陰
偶小故多陽竒屹無傾誰將春雷具散作秋蟲鳴既知
治長少莫歎才虛生

凝冰得火力鬱鬱陽春姿寧滅不肯寒陽火如松枝詩
家有醇醪釀此松中竒一飲盡千山枯株彼何為所以
東坡翁偃蹇不可羈

黃河萬古濁猛勢三峯開客持一寸膠澄清動高懷飛
駕探崑崙尚恐志易乖囑我乘浮槎徑往天池棲就引

明河清為洗崑崙泥相看淚如雨千年苦難諧何當御
元化擺落人世迷下覽濁與清瞬息千百迴

十年小學師一屋荒城隅饑寒吾自可畜養無一途亦
愧縣吏勞催徵費馳驅平生禦窮氣沮喪恐無餘長歌

以自振貧賤固易居

貧賤固易居貴盛
難為工嵇叔夜詩

士窮失常業治生誰有道身閒心自勞齒壯髮先老客
從東方來溫言慰枯槁生事仰小園分我瓜菜好指授
種藝方如獲連城寶它年買溪田共住青林表

此身與世味況若不同時惟餘雲山供有來不徑辭時
當持詩往報復禮在茲有客向我言於道未無疑不為
物所役乃受烟霞欺聞此忽自失一笑姑置之

執價韓伯休混跡在人境百錢嚴君平閱世心獨醒我
無騰化術凌虛振衣領又無辟穀方終年酌清潁會須
學嚴韓遺風相煥炳

吾宗幾中表訪我時一致自吾居此庵才得同兩醉逆
數百年間相會能幾次每會不盡歡親情安足貴所歡

在親情杯水亦多味

器飲代窪尊巢居化安宅凡今佚樂恩孰非聖神迹況
彼耕戰徒勤力有千百乞我一身閒坐看山雲白內省
吾何功停觴時自惜

四時有代謝寒暑皆常經二氣有交感美惡皆天成天
既使之然人力難變更區區扶陽心伐鼓達天庭乾坤
固未壞杞人已哀鳴雖知無所濟安敢遂忘情

諸生聚觀史掩卷慕高風兀如遠游仙獨居無事中盛

哀閱無常倚伏誰能通天方卯高鳥地已產良弓

人生皆樂事憂患誰當得人皆生盛時衰世將盡惑水性但知下安能擇通塞不見紇干雀貪生如樂國古今同此天相看無顯默

人生喪亂世無君欲誰仕滄海一橫流飄蕩豈由已弱肉彊之食敢以凌暴耻優游今安居驩然接隣里曲直有官刑高下有人紀貧羸誰我欺四廬安所止舉酒賀生民帝力真可恃

人君天下師垂衣貴清真義皇立民極坐見風俗淳有
德豈無位萬古湯盤新師道嗟獨行此風自周秦獨行
尚云可誰以儒自塵有名即有對况乃一行勤聖人人
道爾豈止儒當親儒雖百行一致遠非迷津矧伊末世
下空有儒冠巾何當正斯名遙酹千載人

和有會而作

并序

今歲旱米貴而棗價獨賤貧者少濟以黍食
之其費可減粒食之半仁人之與物貴賤亦

適相當蓋亦分焉而已偶有所感而和此詩
農家多委積淵明猶苦饑況我營日夕凶歲安得肥衮
綢一飽計何暇謀寒衣經過米麥市自顧還自悲彼求
與此有相直成一非尚賴棗價廉殆若天所遺惟人有
貴賤物各以類歸小兒法取小淺語真吾師

和擬古

九首

鬱鬱歲寒松濯濯春風柳與君定交心金石不堅久君
衰我不改重是平生友相期久自醉中情有醇酒義在

同一家何地分勝負彼此無百年幾許相愛厚持刀斷
流水纖瑕固無有

客從關洛來高論聽未終連稱古英傑秉國或從戎建
立天地極蔚為盖世雄功成脫樊屣飄然薊遺風生世
此不惡君何守賤窮急呼酌醇酒延客無何中

同游非所思所思天一隅有問所思誰意在言不舒古
今猶旦暮四海同一廬恍惚精靈通似見與我居攬衣
欲從之寒月照平蕪茫然不知處歎息將焉如

朝游易水側暮上燕臺荒燕王好神仙不見金銀堂江
山古神器海色圍蒼茫哀哉王風頽日化爭奪場抹世
豈無人齋志歸北邙撫此重長歎青山忽軒昂呼酒樂
今朝往事置一方遙知蓋棺後亦起千載傷

依依月光缺熒魄恒獨完清光如素絲長懷綴君冠形
雖隔萬里咫尺皆君顏望君君不來十年不開關豈無
黃金贈藉以青錦端愛惜明月珠肯為一雀彈庭前秋
栢實月夜棲孤鸞君嘗寸心苦中有千歲寒

河流高拍天，沅水狀在茲。自傷困無力，乘彼朝宗時。顏色變涇渭，風味存澠淄。願君深識察，期君不相疑。此情良可憐，感慨贈以辭。辭云：丹山鳥，千載多苦思。身游九霄上，不受塵世欺。忍饑待竹實，浩蕩今何之。歌以靈鳳謠，亂以猛虎詩。

西山有佳氣，草木含清和。道逢方瞳翁，援琴為我歌。音聲一何希，一唱三歎多。問翁知此誰，指我蟠桃華。所望在千年，君今將奈何。

翩翩誰家子慷慨歌遠遊忽記少年日猛志隘九州何
物能勸人有此歲月流君心海無底亦使成高邱贈君
一卷書其傳自衰周讀此當自悟擾擾將焉求

巖巖牛山木久矣困樵採望望深澗芝無人香不改一
葉振江潭輕波欲達海幽明理一貫影響不相待願天
誘臣衷所求惟寡悔

和雜詩

十一首

日食百馬芻足有萬里塵乃知一駿骨可百駕胎身生

汝天已艱天復無私親
安肯養一物侵奪空四隣
長饑汝自取况值秋霜晨
難生復難長愁絕藝蘭人

胸中無金山橫側變峰嶺
不及靈椿秋遂謂長春景
只見栢參天豈知根獨冷
井蛙見自小夏蟲年不永
天人互償貸千年如響影
廓哉神道遠瞬息苦馳騁
平生遠游心觀物有深靜

晝長夜乃短百刻君自量
贏餘雖可致君省蜜蜂房
董生論齒角三策奏未央
樂天喻花實妙理通陰陽

白詩
荔支

非名花壯
丹無佳實
稠薄只升米聽爾宜饑腸

好事理難阻人情多畏豫芝蘭種不生鸞鴻動高翥遂
令好賢心艱親恐易去巢燕不待招庭花免憂慮所以
末世下凡百古不似皎皎千里駒肯為場苗住求賢非
吾分切已在何處平生取友志持此當警懼

因觀倚伏機亦愛柱下老時危不易度遜默庶自保不
見春花樹隆冬抱枯燥生意歛根柢發泄敢獨早聖德
實天生自信耿中抱猶存悄悄心庸人安足道

幼安返鄉郡知音得程喜有問平生心但說臨流事乾

坤魏山陽史筆凜生意物外此天民與魏偶相值

見通鑑綱

目澹然涉世情月閑雲自駛我作安化箴

上安其賢民化其德見管

寧傳

韋絃不須置

太玄豈無知不覺世運迫為問莽大夫何如成都陌

揚雄

嘗師嚴君平

扶搖得真易長卧山雲白

扶搖白雲皆陳圖南號

中有安

樂窩氣吐宇宙窄消長粲以密我主彼為客

觀先天圖可見

問

子居何方囊中有真宅

朝耕隆中田暮採成都桑平生淡泊志醜女同糟糠愛

此真丈夫忘我厨無糧當年靜修銘團茅鷄距陽

雞距保府

泉名舊嘗取武侯靜以修身語名所寓舍靜修龕

回頭十五載塵跡徒自傷山

居久岑寂主靜豈無方安得無極翁酌我上池觴

燕南可避世逸興生雲端安得百里封一邑不改遷絃

誦和寒流溝涂映晴巔思此良自苦躬耕望盤飧願從

八吟翁

橫渠有八吟詩因自謂八吟翁

同結一井緣買山不用詩探囊

謾千篇

西山霍原宅古跡猶可稽

見水經注

重吟豆田謠愁雲落崩

崖

豆田謠見霍原本傳

魯酒邨鄆園撫事傷人懷林宗自高士此

世淹亦彌一聞孺子語西風草披離知幾在明哲何事
絀塵羈君觀括囊戒無盈庶無虧

我游深意寺即山古清涼興妖如米賊乘時起陸梁

見五

代史記

不見重華帝所居亦成鄉乾坤師道廢春陽變秋

霜撫事三太息欲語意何長

和詠貧士

七首

陶翁本強族田園猶可依我惟一畝宅貯此明月輝翁
復隱於酒世外冥鴻飛我性如延年與衆不同歸孤危
正自念誰復慮寒饑努力歲云暮勿取賢者悲

獨正者危至方

則礙爾實慨然中言而發違衆速尤迂風先
蹶此淵明規顏延年語也見延年誄公文

王風與運類一輕不再軒消中正有長冬溫見底園人
才氣所鍾亦如燭後烟寥寥沫泗心千載誰共研龍門
有遺歌三歎誦微言意長日月短持此托後賢

淵明老解事撫世如素琴似人猶可愛況乃懷好音鄉

問誰盡賢招飲亦相尋豈有江州牧既來不同斟仲尼
每諱魯邦君誠可欽史筆自好異誰求賢者心

木石能受唾豈獨相國婁視唾若如雨褊人亦不酬無
心乃直道矯情實莊周身外不為我袒裼吾何憂伯夷
視四海願人皆我儔吾謂下惠隘此說君試求

飲酒不為憂立善非有干偶讀形神詩大笑陶長官傷
生遂委運一如咽止殮參回豈不樂履薄心常寒天運
安敢委天威不違顏莊生雖曠達與道不相關

物外有幽人閱世如飛蓬浮名不可近造物難為工西
京二百年藉藉楚兩龔豈知老父觀才與薰膏同為問
老父誰身隱名不通偶逢荷蓀者欣然欲往從

生類各有宜風氣異九州易地必衰悴蓋因不同儔水
物困平陸清魚死濁流麟亡回既夭時也跼無憂天亦
無奈何自獻敢望酬寄語陶淵明雖貧當進脩

和詠二疏

委質義有歸乞骸老當去豈無戀闕心難忘首丘趣在

禮此常典末世成高舉漢庭多公卿圖畫兩疏傳至今
秦中吟感歎東門路目覩霍將軍功高擅恩顧一朝產
危機千載損英譽仲翁幸及年安肯嬰世務聖主賜臣
金奉養行所素造物佚我老餘齡今自悟田園付子孫
身後復無慮神交冥漠中樂境尚森著

和詠三良

江山錯如繡死與敝屣遺安用親愛人共此丘土微秦
人多尚氣宜無兒女私乃亦如當途區區闕因傷

秦政惡三歎王綱虧殉人已可誅而況收良歸坐令百
夫特含恨與世違祇應墓前栢直幹千年希遙知作俑
戒為感詩人悲重吟黃鳥章淚下霑人衣

和詠荆軻

兩兒戲邯鄲六國朝秦嬴秦王驚鳥姿得飽肯顧卿燕
丹一何淺結客報咸京當時勢已危奇謀不及行政使
無此舉寧免繫頸纓如丹不足論世豈無豪英天方事
除掃孰禦狂飈聲我欲論成敗高歌呼賈生乾坤有大

義迅若雷霆驚堂堂九國師誰定討罪名一戰固未晚
何為割邊庭區區六孱王山東但空城益荀豈無術乘
時失經營今雖聖者作不抹亂已成酒酣發羽奏亂我
懷古情

和讀山海經 十三首

寰區厭迫隘思見曠以疎四壁畫諸天愛此金仙廬丹
青煥神跡勝讀談天書乃知屈子懷託興青虬車回首
百千世朝露棲園蔬歸來誦陶詩復與山經俱山經何

所似俚媼談浮圖汗漫恐不已身心歸晏如

鳳鳥久不至思君慘別顏中心藏竹實炯炯空千年
年寄何所云在丹穴山何當一呼來徵爾無稽言

翩翩三危鳥為我使崑丘聞有西王母靈化略難儔
願清黃河源一洗萬里流吾生豈無志所居非上游

瀟湘帝子宅縹緲乘陰陽欲往從之游風波道阻長
秋風動環珮星漢搖晶光月明江水白萬里同昏黃

重華去已久身世私自憐皇靈與天極蒼梧渺何山
晴

空倚翠壁白雲淡無言愁心似湘水猶望有歸年

夢登日觀峯高撫扶桑木手持最上枝傳與甘澗谷一
笑天驚白蒼涼出新浴何方積九陰區區尚龍燭

累累玉膏實泠泠琪樹陰鸞鳳自歌舞瑟瑟風動林風
林奏何樂賓天有遺音君何坎井念永負琅園心

明星捧玉液太華參天長仙掌一揮謝此樂殊非常矯
首望夸父饑渴無餘糧弄競竟何得歸哉此中央

水物自一隅亦復具飛走乃知造化工錯綜無欠負茫

茫山海間形類靡不有此亦何可窮一覽置肘後

遙醉楚江騷清愁浩如海蹈襲此何人興寄果安在豈

期紫陽出誇謾莫追悔

見朱文公楚詞辨証

五藏今九丘

五藏見山海經

序
除去尚奚待

流觀山海圖淵明有深旨撫心含無疆觀形易生死異
世有同神此境若親履何以發吾歡濁酒真可恃

扶疏窮巷陰回車想高士厭聞世上語相約扶桑止讀
君孟夏詩千載如見爾開襟受好風試學陶夫子

陶令自高士葛侯亦奇才中州亂已成翩然復南來三
游領坡意厭世多驚猜不妨成四老雅興更悠哉

静修集卷二

欽定四庫全書

靜修集卷三

丁亥集三

元 劉因 撰

七言古詩

二十三首

桃源行

六王掃地阿房起桃源與秦分一水小國寡民君所憐
賦役多慙負天子天家正朔不得知手種桃枝辨四時
遺風百世尚不泯俗無君長人熙熙漁舟載入人間世
却悔桃花露踪跡曾聞父老說秦強不信而今解亡國

畫圖曾識武陵溪飛鴻滅沒天之西但恨於今又千載
不聞再有漁人迷

明妃曲

初聞丹青寫明眸明妃私喜六宮羞再聞北使選絕色
六宮無慮明妃愁妾身只有愁可必萬里今從漢宮出
悔不別君未識時免使君心憐玉質君心有憂在遠方
但恨妾身是女郎飛鴻不解琵琶語祇帶離愁歸故鄉
故鄉休嗟妾薄命此身雖死君恩重來時無數後宮花

明日飄零成底用
宮花無用妾如何
傳去哀絃幽思多
君王要聽新聲譜
為譜高皇猛士歌

塞翁行

塞翁少小壘上鋤
塞翁老來能捕魚
宋家昔日塞翁行
屯田校尉功不如
西山瀛海接千里
長城又見開長渠
要將一水限南北
笑殺當年劉六符
天教陂澤養鴈鶩
留與金人賦子虛
我來鄉國覽風土
髣髴撾鼓笛嗚嗚
胸中雲夢忽已失
酒酣懷古皆平蕪
昔年阻水羣盜居

塞翁子孫殺欲無至今遺老向人泣前宋監邊無遠圖

武當野老歌

南陽武當天下稀峰巒巧避山自迷青天飛鳥不可度
但見萬壑空烟霏山不知人從太古白雲飛來天作主
旌旗明滅漢陽津幾閱東西互歷風雨老人住此今百年
自言三世絕人烟往事不聞宣政後初心欲返羲皇前
脯鹿為糧豹為席竹樹蒼蒼歲寒國天分地坼保無憂
怪見北風山鬼泣一聲白鴈已成擒回望丹梯淚滿襟

傳語桃源休避世武陵不似武當深

感秋

思古人之
不可見也

湘絃悠悠阻清音駕車欲往洛水深白榆一葉驚河漢
萬里碧霄中夜心玉鸞翩翩紛翠羽鬚機絲隔烟霧
瓊枝難得芳華年惟恐流光兩遲暮河傍有星名牽牛
此星既出令人愁明朝再見明河影已隔人間萬古秋

飲後

日光射雨明珠璣怒氣鬱作垂天蜺天漿海波吸已竭

倒景徑入黃金卮金卮一傾天宇開天公愁吐胸中奇
海風掀舉催月出吹落酒面浮明輝瓊芝瑞露千萬斛
肝腸瀟瀟清欲饑金宮銀闕此何處夜半夢落崑崙西
眼中之人素所期赤霜為袍丹霞衣明星煌煌何太速
碧霄悵望白雲低

西山

西山龍蟠幾千里力盡西風吹不起夜來赤腳踏蒼鱗
一著神鞭上箕尾天風泠泠清入肌醉抱明月人間歸

嫦娥灑淚不敢語銀河鼓浪霑人衣寄謝君平莫饒舌
袖中此物無人知

登荆軻山

兩山巉巖補天色中有萬斛江聲哀人言此地荆軻館
尚餘廢壘山之隈太子西來函關開誰信生兒為禍胎
筆頭斷取江山去已覺全燕如死灰馬遷尚俠非史才
淵明憤世傷幽懷春秋盜例久不舉紫陽老筆生風雷
遺臺古樹空崔嵬平蕪落日寒烟堆紛紛此世亦良苦

今古燕秦經幾回憂來徑欲浮蓬萊安得魯連同一杯
碣石東頭喚羨門六鰲載我三山來

薛稷雙鶴

胎禽寥廓非人境只許清江見寒影書家筆頭垂露姿
一變凌雲更脩整前鶴忘機如易馴後鶴昂藏不可羣
二鶴相睂如有語松下磐石少此人

幼安濯足圖

漢家無復雲臺功平生不識大耳公眼中天意鏡中語

此身只有扁舟東關東諸公亦英雄百年能辨山陽封
歸來老栢號秋風世事悠悠七十翁乾坤故物兩足在
霜海浮雲空復空無刀可斷華太尉有死不為丕大中
丹青白帽凜冰雪高山目送冥飛鴻為問蘓家好兄弟
萬古北海誰真龍

長公愛文舉次公愛幼
安益氣質各以類云

采菊圖

天門折翼不再舉袖手四海橫流前長星飲汝一杯酒
留我萬古羲皇天廟堂衮衮宋元勳爭信東籬有晉臣

南山果識悠然處不惜寒香持贈君

歸去來圖

淵明豪氣昔未除翱翔八表凌天衢歸來荒徑手自鋤
草中恐生劉寄奴中年欲與夷皓俱晚節樂地歸唐虞
平生磊磊一物無停雲懷人早所圖有酒今與龐通沽
眼中之人不可呼哀歌撫卷聲嗚嗚

雪翠軒

西山萬古青未了黛綠鬟雲已傾倒豈知太虛忽生白

恍如厚夜今復曉紫陽仙翁見本根白波開天餘浩渺
胸中盤曲此高寒曾夢肝腸倚天表蒼崖飛來天出巧
為護烟嵐翠如掃萬縷寒烟吹不舉靜秀依依見娟好
此時先生一開軒平生壁立今玉削脚底游塵軟更紅
黑頭擾擾誰為雄臨風回首三太息安得置此冰壺中
西山秀色千萬重一顧可洗浮雲空遙望飛泉駕遠壑
中有一路開雙松人間風日不到處來訪軒中雪翠翁

山中

山中望塔倚天表今得全山如立草不知天地視全山
何如一粒江湖渺平生老眼如層梯昨日所為今兒嬉
神功天巧祇如此人力區區能幾爾世間壯觀徒紛紜
堯舜事業猶浮雲

飲山亭雨後

山如翠浪經雨漲開軒宛坐扁舟上西風為我吹拍天
要駕雲帆恣吾往太行一千年一青才遇先生醉眼醒
却笑劉伶糟麴底豈知身亦屬螟蛉

巫山圖

朔風捲地聲如雷西南想見巫山摧江南圖籍二百年
一炬盡作江陵灰不知此圖何所得眼中十二猶崔嵬
猿聲髣髴餘山哀行雲欲行行復回神宮縹緲望不極
乘風御氣無九垓區區雲夢蹄涔爾豈知更有陽雲臺
李賀醉吟圖

赤虬翩翩渺無聞望之不見矧可親浮世浮名等濁溷
眼中擾擾投詩人心肝未了人間春龐眉尚作哦詩顛

太平瑞物不易得昌黎仙人掌中珍北風瀟瀟吹野燐
千年淚雨埋青雲乾坤清氣老不死丹鳳再來須見君

後賦赤壁圖

公無渡河歸去來周郎袖裡藏風雷老狐千年快一擊
金眸玉爪不凡材先生平生兩賦爾江山華髮心悠哉
只今畫裡風月笛尚有老驥西風哀眼中驚波不西歸
玄鶴夜半從天迴曹劉閑氣今何處船頭好在白雲堆

陳氏莊

陳氏園林千戶封晴樓水閣圍春風翠華當年此駐驛
太平天子長楊宮浮雲南去繁華歇回首梁園亦灰滅
淵明亂後獨歸來欲傳龍山想愁絕今我獨行尋故基
前日家僮白髮垂相看不用吞聲哭試賦宗周黍離離
陳氏先父之外家也金章宗每遊獵必宿其家淵明謂先父龍山指益嘉事

采石圖

何年鑿江倚青壁乞與中原作南北天公老眼如看畫
萬里才堪論咫尺蛾眉亭中愁欲滴曾見江南幾亡國

百年回首又戈船可憐辛苦磯頭石江頭老父說當年
夜捲長風曉無跡古人衮衮去不返江水悠悠來無極
只今莫道昔人非未必山川似舊時龍蟠虎踞有時歇
月白風清無盡期古人看畫論兵機我今看畫詩自奇
平生曾有金陵夢似記扁舟月下歸

金太子允恭唐人馬

道人神駿心所憐天人龍種畫亦然房星流光忽當眼
徑欲攬轡秋風前漢家金粟幾蒼烟江都筆勢猶翩翩

東丹獵騎自豪貴風氣惜有遼東偏
天人秀發長白山
畫圖省識開元年金源馬坊全盛日
四十萬匹如秦川
天教劫火留此幅玉花浮動青連錢
英靈無汗石馬復
悲鳴真似泣金仙只今回首望甘泉
汾水繁華雁影遙
竒探竟隨轍迹盡兀坐宛在驂騑先
人間若有穆天子
我詩當作祈招篇

宋理宗書宮扇

并序

杭州宮扇二好事者得之燕市一畫雪夜泛

舟一畫二色菊理宗題其背有興盡為期及
晚節寒香之句諸公賦詩予亦同作

天津月明啼杜鵑梁園春色凝寒烟傷心莫說靖康前
吳山又到繁華年繁華幾時春已換千秋萬古合歡扇
銅雀香銷見墨痕秋去秋來幾恩怨一聲白雁更西風
冠蓋散為烟霧空百錢韞錦天留在袖胎要鑒驪山宮
當時夢裡金銀闕百杯樓前無六月瓊枝秀發後庭春
珠簾晴捲天門雪棹歌一曲白雲秋不覺金人淚暗流

乾坤幾度青城月扇影無情也解愁五雲回首燕山北
燕山雪花大如席雪花漫漫永戡戡大風起兮奈爾何

續十二辰詩

饑鷺嚇鼠驚不起牛背高眠有如此江山虎踞千里來
才辨荊州兔穴爾魚龍人海浩無涯幻境等是杯中蛇
馬耳秋風去無跡羊腸蜀道早還家何必高門沐猴舞
豚穿鷄栖皆樂土紫門狗吠報隣翁約買神猪謝春雨

雜言

五首

觀雷溪

飛狐天下脊老氣盤五回三江湧天怒合為一水東南
來此勢不殺令人愁石門喜見西山開未補青天裂誰
鑿混沌胎奇聲猛狀萬萬古山根幾許猶崔嵬兩山倒
傾瀾百丈逢顛崖先聲動毛髮餘夾開襟懷初疑萬壑
轉奔石意象髣髴坤軸摧又疑鼓角鳴地中百步未到
仍徘徊荒祠下石磴駭目何雄哉春風不到太古雪今
日乃得胸中雷穿石誰能窮窟宅流沫勢欲浮蓬萊平

生芥蒂今寒灰兩耳到骨無纖埃
酈元筆頭天下水石門之竒猶見推
乃知茲遊亦竒絕快弄素電噴瓊瑰
東崖一片石坐撫千年苔為招郎山君
共捲長鯨杯江妃為搗靈鼓催赤鯁躍
出銀山堆先生醉來泉灑面狂歌一和
湍聲哀

遊郎山

昨日山東州馬耳索御凌風嘶今日軍市中不覺已落
山之西山之面背一無異不待風烟變化神已迷危關

度雪嶺亂石通荒蹊林間小草不識風日自太古我行
終日仰羨木杪幽禽啼但見雨色來雲物颺以淒忽然
長嘯得石頂痛快如御駿馬蹄萬里來長風五色開晴
霓長劍倚天立皎潔瑩鸛鵲平地拔起不傾側物外想
有神物提詩家舊品嵩少同畫圖省見巫山低誰令九
華名獨與八桂齊千態萬狀天不知敢以兩目窮端倪
霧騰誰避若飛隼側瞰何屈如怒猊千年落窮邊烟草
寒萋萋若非酈亭書生此鄉國物色誰省曾分題

酈道
元註

水經說郎山形勢最真今涿
郡有酈亭其先世所居也

乾坤至寶會有待豈有江

山如此不著幽人棲頗聞山中人雲間時聞犬與鷄只
疑名山別有靈境在不許塵世窮攀躋不是先生南遊
有成約徑欲共把白雲犁九疑窺衡湘禹穴探會稽玉
井爛賞金芙蓉日觀倒捲青玻瓈風烟回首莫瀟灑南
遊準擬相招攜

挂書牛角圖

長安江都搏手空台司光祿誰雌雄大事既去乃爾耳



渠頭不斫將安容暗鳴千年楚重瞳將軍視之猶楚公
挂書牛角亦偶爾史臣比擬良未同青青澤中蒲秀色
自凌空可憐徐包徒學術皆凡庸君不見羣兒驅羊竟
何功晉陽桃李亦秋風緱山圖畫有如此何如長作多
牛翁

浙江潮圖

山人懶絕夢亦然昂如萬牛不可遷誰信畫工筆頭有
神力扁舟一夜江聲寒覺來千里雪漫漫中有數點青

我聞人間天門壯觀已如此豈知大塊喘息四海如鼻
端海中仙人冰雪顏吸風御氣非人寰試問濤頭何當
還為我寄聲三神山我欲乘興遊其間

清江曲

清江芙蕖玉可憐
岼花汀草自年年
來鴻去燕不相識
曉露無聲香暗泣
江樓縹緲如花人
望之見之不可親
無限晴雲錦樹新
愁眉只向遙山顰
遙山一千里長在
愁眉底鏡裡繁華
過眼空遙山鑄向
青銅中遙山遙復

遙芙蓉霜早凋
明日愁眉為誰掃
月白江清天未曉

靜修集卷三

欽定四庫全書

靜修集卷四

丁亥集四

元 劉因 撰

五言律詩

三十七首

除夕

百歲三分一初心謾慨然空囊難避節青鏡不留年靜
閑無窮世閒觀已定天履端思後日四鼓未成眠

晚上易臺

遺臺連廢壘落日展遙岑海嶽天東北燕遼世古今每

當多感慨直欲罷登臨莫更留塵跡千年不易禁

登武陽

朝遊樊子館晚上武陽城潮接滄溟近山從碣石生
斷虹雲淡白返照雨疏明且莫悲吟發樵歌已愴情

鄉郡南樓懷古

南北世更迭江山人重輕澶淵出師詔顯德受降城
遺恨幾時盡寸心千載生區區蓼花詠癡計欲何成

滿城道中

學館三年夢西山此日行人生兩屐足世累一蓑輕別
澗水流合斷林烟浦平誰能分半壑相與結巖耕

夏夜

院靜復夜靜幽人世慮輕是非容勿辨憂寵莫多驚萬
樹烏飛月千家犬吠聲夢回無一事惟有紙窓明

重游源泉

人世自人世翛然物外身滄溟來照影白帽恐生塵題
壁雲封石攀花鳥護春今年風景別開卷覺詩陳

張氏別墅

惡木推不去好山招未來豈無平曠地當有妙高臺芳
草趁陰坐雜花隨意開東南村落近試與問新醅

書堂旅夜

二首

少小抱孤苦飄零重此行迂疏從我好憂戚賴天成夙
志存無幾羈懷觸又生寸心同弱草歲晚怯霜清
淹留已半載去住意何深月色一千里愁人方寸秋
聲助搖落生理嘆浮沉松桂清霜滿哀歌動故林

生日

四十舉兒子明珠掌上希
圭璋蒙養正未蚤病防微
春露有時降孤雲何處飛
悲歡共今夕餘涕不勝揮

虞帝廟

淫祀徧區宇空山餘帝宮
皇靈有天在像設與人同
身世千年後塵埃百感中
清泉分一酌毛骨潤南風

奇村道中

此日西塘路乘閒作勝游
深溪柳成巷脈脈稻分溝
白

石長舍雨黃花不受秋移居新有意試就野人謀

城南

山人懶到骨一出動經秋欲赴城南約如營海外遊岸
容收潦盡邨色帶烟留禾黍歲將晚農家猶未休

有客

有客談稼穡對人增感傷自言二頃業不博半年糧宿
麥得春早晚田經早霜無功一杯粥俯首汗如漿

早行

曙色警初動物情無久閒薄凌護頽岸落月淡空山殘
夢失逆旅少休期守關尋常午窓雨擁被聽珊珊

白菊

仙草尚孤潔東籬芳未芳精神渾是露氣勢已無霜夜
月藏不得晚風吹又香天教陶靖節素髮與交光

水亭夏日

孤亭耿獨坐一碧淡凝秋氛雜市聲遠空明雲影留傷
時仍磊磊對景即休休幾欲解維去乾坤無釣舟

野興

乘興閒登眺歸來晝掩扉靜中見春意動處識天機大
節始終論全才今古稀平生有舊約常恐寸心違

秋望

病骨秋偏早單衣露爾寒微雲生水際暝色起林端地
迥月遲下樓高山易殘輕風吹欲舉醉袖拂層巒

雜詩
五首

堯山唐故國渾朴帶遺蹤種果收奴力開田享素封來

牧多上藥景仰近神峰夢寐驅黃犢巖居一老農

冀北高寒境英靈海嶽金斯文若程邵家世亦幽燕祀
典令誰舉遺經會有傳吾鄉此盛事瞻仰在他年

何事招提好山深馬可驅松巢低映帽竹溜細通厨霜
栗千封戶雲屏四畫圖冠巾如我用白鹿起規模

巖居訪高道少日在風塵回首話前事低眉厭此身江
山資寇盜田畝化荆榛領取天倫重無君愁殺人

水遶千山合雲藏數畝荒初尋香有陣漸入翠成行豚

竄依危石牛蹊帶小塘團茅庵如畫可惜是逃亡

早發濡上

寒出防優逸詩情非浩然烟濃山失色雲重雪連天
坏戶仙游上冰髯老境前別家忘再宿桑海問何年

偶書

擾擾推遷裡誰知不偶然要從人力外推見事機先
青白天公眼低昂造物權俗情謾悲喜倚伏有他年

宿田家

偶到田家宿歡迎如遇仙杯盤陳戶側妻子拜燈前青
白眼誰靜炎涼情易偏豈知人世外還有野夫憐

半世

半世恒棲托孤生被險艱寡言非蘊蓄褊性類清閒生
計朝霞上交情暮雨間柴門本無客幽僻況長關

重渡潯沱

遙臨潯水岸回望土門關秋色巉巖上川形拱抱間分
疆人自隘設險地誰慳欲問前朝渡江鷗故意閒

恒山樓

萬嶺尊恒嶽遺臺枕後潭仰高慙對坐哭險負竒探影
落滄溟北雲開斗柄南山靈憐野客今夕費烟嵐

登鎮州陽和門

百尺市門起重過為暫停豪分秋物色米聚趙襟形北
望雲開嶽東行氣犯星憑闌天宇在人事聽浮萍

辛巳中秋旅亭獨坐

分光陰太盛無力掩蒼溟大塊供微黑高天失舊青興

從愁外發秋向露邊零點數山河影依稀見草亭

文章

文章費餘力齒髮愧初心璞有連城璧精非百鍊金靜
中天地我閒裡去來今烏散爐薰盡長歌激暮陰

一身

一身能換骨毛髮散沖融氣變精神後人生感化中朝
陽方杲杲春意正濛濛百載唐虞德方成比屋功

周邵

百年周與邵積學欲何期徑路寬平處襟懷洒落時風
流無盡藏光景有餘師辜負靈臺境圖書重一披

上塚

過家來上塚顧影念孤蹤春露歡迎失寒泉感激濃千
金一毛髮十夢九音容不惜從黃壤多慚未了胸

七言律詩

六十九首

春陰

淡淡春雲暖更輕一身酒力若雲生無人也笑樂所使

未醉先休氣始平時雨露枯或有葉微風着物不聞聲
人生日用本無事閒倚西窓候晚晴

秋日有感

自恐規模日慙然每便孤坐靜無邊仰觀俯察無多地
往古來今共此天或智或愚能幾里一鳴一止又千年
南山正在悠然處目送歸鴻手絕絃

多病

多病年來放盡慵一龕堅坐避深冬欲忘言處飲先醉

不得意時山故濃只許國人知我陋

見邵子無名公序

無妨高

論笑吾庸

見司馬公庸書序

西巖近有仙芝種為謝白雲著意

封

日午

日午雲輕草色蘇出門杖屨自徐徐乾坤俯仰窺難見
花柳青紅畫不如靜處規模惟厭小動時文理却嫌疏
眼前光景無窮態註畫瀟溪太極圖

偶成

一語未能分付時難言方信到真知道叅天地用何小
心有羲皇生豈遲後世直須要揚子百年即我是鍾期
折花笑對滄浪影不覺東風就手吹

湖上

湖上幽居事事幽卧看書卷坐垂鈎晴窓閒是長年國
暑簟靜為無熱立心遠何妨在人境室虛元自有天游
家人大笑詢生理報我西風咫尺秋

十月朔展省後登古城有感

手線西風失弊衣
高城烟樹掛斜暉
徘徊飛鳥不忍去
蕩漾滄波如欲歸
幾為霜來驚露往
每因物是見人非
詩書未辨鄉隣化
道德初心恐易違

道士孫伯英容城故居

并序

伯英名邦傑世為縣之貴族遺山元公為作
墓銘稱其遊太學所與交皆天下名士氣甚
高見金世已亂天下事無可為思得肆志方
外以耗壯心而老歲月遂為黃冠師以終葵

毫之太清宮側時年五十一因見先君子錄
其家世文行之美以示鄉人今過其居感而

賦詩

政教才氣敵希夷冠帔翻然亦未宜誰辨胡寅論鴻客

見讀史
管見

只除坡老識安期

見安期
生詩

可憐喬木空秋色惟

有青山似舊時欲傳先賢問遺事故園猿鶴不勝悲

過鄉縣西方古故居

并序

古今大定間人嘗舉進士不第遂歸獨居一

室置琴書其側不妄與人交縣令佐公服候
門亦以遜辭謝遣之有田數十畝食其所獲
如菽熟惟食菽鄉人好事者欲以米易之不
聽曰天所食者不可易也監察御史按行郡
邑聞其行上之不報其為人蓋亦近於聖學
之所謂狷史家之所謂獨行者歟先父每舉
以律鄉人之貪鄙者故鄉人至今能道之古
死無後其丘壠已為樵牧區今過其居亦莽

馬荊棘中矣不覺感歎夫發潛德而紀先賢
實後生之責也顧力未能焉姑題詩以記先
父之訓云

名姓初聞自過庭山田力食老窮經鄉閭月旦歸公論
耆宿風流尚典型感事重吟見繹集懷賢誰築聘君亭
還家遊子悲千種念舊思親淚最青

登雄州城樓

古戍寒雲接渺茫故鄉遊子動悲涼江山自古有佳客

烟雨為誰留太行野色分將愁外綠物華呈出夜來霜
海門何處秋聲急極目滄波空夕陽

夢先壠

望望東阡見松桂孤雲為我且踟躕十年一夢等閒過
四海此身何慮無千丈春暉空寸草萬山明月只啼烏
舊家三徑今誰主羨殺河汾有樊廬

宿玉泉村

先父嘗欲
卜隱於此

怪見清暉逼晚襟太行眉宇未消沉徘徊終日不忍去

寂寞高盟如可尋
欲向孤雲間蹤跡
只應老樹記登臨
棲遲零落今如此
淚盡韋齋刺印心

外家西園李花

無邊晴雪映柴扉
夢裡繁華又一非
人與山丘屬零落
天教草樹記芳菲
每因寒節來相訪
重為餘香不忍歸
里社他年有成約
結庵終擬號春暉

入山

草露珠絲晴日明
亂蟲秋意有先聲
屈盤未轉坡陀盡

蒼翠忽從懷抱生一徑峯回失南北兩山雲近異陰晴
天公若會登臨意可信傷心畫得成

晚眺

巖姿濃淡似吾詩雲點青山學鬚絲老樹遺臺秋最早
夕陽流水鳥偏遲無人能解此時意如我曾來前古誰
本為登臨解陶寫豈知搖落更堪悲

山中月夕

滿懷幽思自蕭蕭況對空山夜正遙四壁晴秋霜著色

一天明月生潮歌傳岩谷聲豪宕酒泛星河影動搖
醉裡似聞猿鶴語百年人境有今朝

惡鳥

山中夜夜聞惡鳥惡鳥聲中似訴渠氣運變遷皆以類
陰陽對待不相無形聲如此誰憐我天地初生已有子
能辨春風長白日願將花柳付提壺

五月二十三日登城樓

獨倚危闌數鬢毛一簾輕燕晚涼高雲移山影亂初定

雨帶風聲來漸豪物外此天才一幙人間何事不秋毫
遠遊未盡平生興幾欲狂歌續楚騷

曉出西塘

塘水隨人緩步行哀湍激石故輕清太行穠秀洗霜淨
全趙規模天鑿成偶為登臨發悲詠忽從毛髮散秋聲
殷勤莫盡尊中酒留到青山佳處傾

南樓

登臨秋思動鄉關展盡晴波落照間歎老自非緣白髮

愛閒元不為青山幾經分合世良苦不管興亡天自閒
初擬憑闌浩歌發壯懷空與白鷗還

良辰

莫遣閒愁負此身鶯花逐月是良辰乾坤痾痒元關我
土木衣冠亦象人大德豈容輕錄怨小疵休廢更求醇
此中空洞渾無物萬紫千紅總屬春

午睡

閒中何事不清妍烏戀花陰伴晝眠窗外雨晴山有暈

枕邊風息樹無絃
面前多放寬平地
方寸嚴臨咫尺天
萬古羲皇有餘意
不妨分我百來年

新晴

小雨新晴草色蘇
家園生理未全疏
埋盆欲學魚千里
試地先栽芋一區
時與老農談稼穡
不因閒客罷琴書
乾坤妙處無人會
卧看牆陰雀哺雛

野亭會飲

三首

列坐平分草色勻
四圍天設翠屏新
不可一日無此客

安得四時長是春野鶴自成難進狀江鷗不作近前嗔
鳥聲自向花枝說好箇羲皇以上人

曳杖蕭然一幅巾山夫野老解相親橫身物內誰為我
賦象天中彼亦人細數平生無此會不來一醉負今春
舉杯自壽復自笑高壑烟霞吾豈貧

行樂人生當及辰今朝光景為誰新林陰薄薄微露日
花氣溶溶暖著人春色十分看欲盡鳥聲千種聽難真
東風就手吹殘酒無限青山動翠鱗

淺酌

淺酌微吟意自真
新詩改罷酒微醺
流鶯暗逐春光老
獨鶴潛驚夜景分
共見白駒如晚景
豈知蒼狗是浮雲
無邊風月誰無分
只恐靈臺未屬君

夢鎮州潭園

先父
舊隱

昨夜分明是鎮州
溪潭先子舊曾遊
魂來千里太行碧
夢覺滿庭烟水秋
古淡園林無限意
登臨今昔幾人愁
當年猿鶴應無恙
爭信書郎謾白頭

過鎮州

太行迎馬鬱蒼蒼兩岸灘聲帶夕陽
霜與秋容增古淡樹因烟景恣微茫
閱人歲月真無謂得意江山差自強
曾記城南舊時路十年回首儘堪傷

井陘淮陰侯廟

二首

饑童羸馬倦重游萬將分兵坐此籌
滅項豈知秦尚在奪齊便覺漢無憂
英彭一體誰遺類絳灌諸孫自列侯
愛殺鹿泉泉水亂山百折只東流

許身良犬笑君癡快快難勝已自危智數相催難免死
才名如此豈無疑兩年蕃鎮真猶假十載君臣喜又悲
最恨當時蕭相國直教三族到全夷

讀漢高帝紀

禮樂經秦掃地空遺民洗眼續王風規模自襲挾書律
舉措惟推約法功魯國兩生心獨遠新城三老義誰同
只知才到蕭曹盡可信高皇是沛公

易臺

望中孤鳥入消沉
雲帶離愁結暮陰
萬國山河有燕趙
百年風氣尚遼金
物華暗與秋容老
杯酒不隨人意深
無限霜松動巖壑
天教搖落助清吟

秋夕大風有感

坤輿聞說若行舟
乘此真堪萬里游
大塊氣豪知寡和
黃紬坐穩覺無求
窓間小草根自賀
雲外高松聲亦愁
明日西山想清瘦
天教老眼看晴秋

盆池

自慙眼孔一盃多奈此無邊風月何莫道渾非九雲夢
不妨能著百東坡斡旋在手天隨轉虛靜如心景自過
誰弄扁舟詫吳越為言吾老怯風波

水燈

南湖新綠破春容一炬才分萬炬同共說金膏能有景
豈知陰火解生紅魚龍水樂三更後星漢仙槎一色中
喚起東坡看清曉向來碧海又青銅

方鏡

當年玉斧落何方陰魄誰教擬太陽翻起坤輿看鰲背
借來心境發天藏衣冠嚴肅知無愧肝膽輪囷覺有芒
四海紅塵競白日託身分我鏡中涼

西窓

洛水秦山夢寐前風流陳邵兩臞仙中峰太華五千仞
皇極一元十萬年廝役闕來歸舊隱速藏畫出稱高眠
人間此意今誰會卧看西窓生暮烟

有懷

飄飄遺世覺身輕尚友千年凜若生
瑞日祥雲程伯子
冰壺秋月李延平
浮沈滄海人事換
晴雪太行眉宇清
曳杖歸來北窓下一尊濁酒為誰傾

記夢

并序

至元戊寅十一月二十四日夢十餘老翁衣
冠甚偉以章疏薦予章中署予為金文山人
而見稱之語甚多既覺惟記松栢歲寒桑榆
晚景之句而每句之下又各忘其六字遂以

詩記之

夢中說夢已成癡更擬從翁問所疑
松栢歲寒應有謂桑榆晚景欲何為
名書丹闕非吾望家在金文不自知
果有仙山隔塵土先生亦欲住仇池

捲簾

捲簾雲樹散微明
淡似幽人百慮輕
真宰鏤雕亦良苦
洪鑪消鑠似無情
空巖月出人境失
灝露秋嚴山氣生
欲寫天機誰領會
西風吹作棹歌聲

偶作

為貪風月重登臨感慨幽懷不易禁
靜裡形神君與我眼中興廢古猶今
區區此世真何物落落平生只寸心
聞道江湖好烟水飛鴻滅沒有遺音

高亭

高亭雲錦遶清流便是吾家太一舟
山影酒搖千疊翠雨聲窻納一天秋
襟懷洒落景長勝雲影空明天共游
笑向白鷗問塵世幾人曾信有滄洲

放歌

未須鵬翼賦垂雲老眼冰壺亦自新
碧落銀河見高舉
紅塵白日屬何人
累累坐閱秋風客
擾擾空悲地上臣
左挽浮丘一杯酒
吾言誇笑不須嗔

自遣

久矣黃塵絕往還
惟餘風月到柴關
清霜烈日從渠畏
野鶴孤雲適自閒
天上銀河連碧落
人間秋色對南山
高吟大醉堯夫老
只有豪誇不易刪

老岸

老岼陰陰雲樹清柴門寂寂綠苔生空明萬象隨月出
水墨四山因雨成千古心期破茅屋百年人事短燈檠
道人不是悲秋客聽盡疎蛩夜夜聲

世上

世上悠悠儘自爭眼中隱隱放教平飛蠅觸鼻人爭怒
落葉臨頭我謾驚既有陽秋暗消長何須青白太分明
蒹葭原上清霜重辛苦十年跣足行

幾葉

幾葉疎桐萬斛秋
四山清露一窓幽
人能知足隨處樂
心若忘機百慮休
事物閱來如有悟
囊箱空慣已無羞
醉中曾聽家人語
老子年來不解愁

萬古

萬古遺編未寂寥
一窓風露晚蕭騷
有時陶令羲皇上
何物元龍湖海豪
鼯鼠千鈞宜自惜
蟾蜍寸鐵亦徒勞
年來點檢人間事
問舍求田計最高

老大

老大情懷隨處樂幽閒氣味逐時添平生長物不入室
一日百錢輒下簾題品雲山寧有諱收羅風月不妨廬
客來恐說閒興廢茶罷呼棋信手拈

山石

山石那容玉獨堅人生磨滅殆天憐畫蛇最戒足無用
書馬常憂尾不全誰見虎鬚真可捋自慚鷄肋豈勝拳
誤人莫向婁師德不領春生未唾前

人生

人生底用廢閒思物理通來盡我師
凍雀猶能樂生處
秋花元不厭開時
齊姜必娶終無偶
秦越未生寧乏醫
若道終安須待足
百年何日可伸眉

夏日即事

迂疏爭笑近清狂
多病筋骸可預防
久乏園蔬因種藥
不留窓紙為抄方
閒從鳥雀分晴晝
靜與蛩螢共晚涼
莫道幽人好標致
北窓自古有羲皇

冬日

砂瓶豆粥土床烟中有幽人意漫然元晦居山豈懷土
仲尼微服即知天閒中作計飽為上書外論交睡最賢
小子應門當拜客病夫便靜乞相憐

午窓

終歲柴荆掩寂寥物情多忌恐難逃家居闕白惟求省
應物寒溫亦憚勞陳瓘只知炊餅大元龍新厭卧床高
午窓葉亂風成陣病擁紬衾氣尚豪

馬酒

漢家桐馬豈無傳力盡皮囊味始全
胸次沃焦常八九眼中騷北少三千
百杯誰有沖駒氣一幕何分敕勒天
彼酪猶能奴命茗南風到此便淒然

平昔

平昔襟期鏡屢看而今涉世願高年
自憐不唾青城地共笑仍憂杞國天
履影無傷猶不忍吹塵雖誤亦當然
人間萬事思空遍依舊西窓理斷編

冬日

迂疏懶散百無能半似田翁半似僧
製藥就園煨芋火檢方聊趁剥麻燈
自知豪爽今無復共道癡頑舊不曾
閒倚南窓貪覓蟲敲門人怪不時磨

次人韻

樂天方識淡中甜安土無妨著處粘
道在市朝皆可隱機忘鷗鳥亦無嫌
牕虛不礙山雲度樹老慣經秋氣嚴
世上閒愁渾幾許而今青鏡滿霜髯

中秋

天借無雲雨借晴月邊涼露滴無聲只知老子興不淺
誰信太虛白亦生四海惟當共人影寸心直擬配高明

二句夢
中得

乾坤元有水壺在回首紅塵意未平

人情

人情雲雨九疑山世路風濤八節灘共說長安如日近
豈知蜀道比天難浮航莫笑腰舟渡坎井終闕木觀

會取登高有良法此身何地不平寬

溫公曰登高有法
徐行則不困腳踏

實地則
不危

有客

門前有客通名姓一別十年記憶無鬚髮俱驚各衰白
行藏已涉幾榮枯急呼滿酌辭醅軟聊用親嘗補飯簾
深盛故來兼久候送歸雖病不須扶

夜雨

夢覺呼童問幾更未應先作不平鳴山深六月有秋意
夜靜滿城惟雨聲四海虛名此身愧百年浮世寸心驚

誰教簷溜如愁思欲斷還連直到明

現前

萬事除無取現前此身隨處可周旋
居南懷北豈安土
已夏願春非樂天誰謂包涵心有外
我知彌滿道無偏
洞觀今古平平在
賸盡區區智與權

上塚

鄉隣見戲說兒童日日相邀社酒同
故國無家仍是客
病軀未老錯呼翁
里胥驗帖徵游戶
縣長聞名謁下風

欲向溪南訪喬木不禁烟雨正空濛

桃花菊

東籬元不是天台誰挽春風到酒杯
丹藥有靈能換種黃花從此不須開
已經晚節霜才識不是寒香蝶亦猜
老眼淵明不今古幾回春去復秋來

夏日幽居二首


隱几南山意獨長回看塵世易炎涼
栽培得力江陵橘薄惡傷心陸氏莊
莫就一時論絳灌要從千載到羲皇

人間何處覓衰好擬問希夷買睡鄉

閉門終歲淡無求雲雨人情亦可憂
斗酒難酬滿車望杯羹直結殺身愁
平生幾兩謾多苦一日百錢姑少休
山鳥不鳴林影靜卧看蛛網掛蜉蝣

夏日飲山亭

借住郊園舊有緣綠陰清晝靜中便
空鉤意釣魚亦樂高枕卧游山自前
露引松香來酒盞雨催花氣潤吟牋
人來每問農桑事攷證床頭種樹篇



靜修集卷四